

Na osnovu člana 38. stav 1. tačka 3. Statuta Općine/Opštine Bosanski Petrovac ("Službeni glasnik Općine/Opštine Bosanski Petrovac, broj:3/05), člana 7. stav 2. Poslovnika o radu Općinskog/Opštinskog vijeća Bosanski Petrovac ("Službeni glasnik Općine/Opštine Bosanski Petrovac, broj:5/05), Općinsko/Opštinsko vijeće Općine/Opštine Bosanski Petrovac na svojoj 21. sjednici održanoj dana 25.09.2006.godine, donijelo je

ETIČKI KODEKS

izabranih zvaničnika - Općine/Opštine
Bosanski Petrovac

1. UVOD

Član 1.

Etičkim kodeksom izabranih zvaničnika Općine/Opštine Bosanski Petrovac (u daljem tekstu etički kodeks) utvrđuju se etička načela i principi ponašanja, kojih terba da se pridržavaju izabrani zvaničnici Općine/Opštine Bosanski Petrovac pri obavljanju svojih poslova i zadataka, odnosno u vršenju funkcija.

Etičkim kodeksom se utvrđuje i postupak prihvatanja obaveze poštovanje njegovih odredbi, te nadzor nad njegovom primjenom.

Član 2.

Pod izabranim zvaničnicima Općine/Opštine Bosanski Petrovac smatraju se lica koja imaju mandat lokalne vlasti povjeren neposrednim ili posrednim izborom (Općinski/Opštinski načelnik, vjećnici općinskog/opštinskog vijeća, kao i članovi radnih tijela općinskog/opštinskog vijeća).

2. PRINCIPI PONAŠANJA

Član 3.

Usvajanjem ovog Etičkog kodeksa izabrani zvaničnici preuzimaju obavezu da će, u cilju obavljanja svojih dužnosti u Općinskom/Opštinskom vijeću Bosanski Petrovac i prema javnosti u cjelini, pridržavati se principa:

- prioriteta Zakona i opšteg interesa,
- integriteta,
- nesebičnosti,
- zabrane mita i korupcije,
- otvorenosti,
- poštenja i odgovornosti,
- izbjegavanje sukoba interesa,
- pravilnog upravljanja resursima,
- obaveze profesionalnog usavršavanja,
- izbjegavanja kumulacije pozicija te uzajamnog poštovanja i uvažavanja,
- uvažavanje i poštovanje političke kulture.

PRIORITET ZAKONA I OPŠTEG INTERESA

Član 4.

U svom cjelokupnom djelovanju izabrani zvaničnici će uvijek poštivati prioritet Zakona i opšteg interesa i svoje aktivnosti će usmjeriti i djelovati u ostvarivanju javnog interesa.

Izabrani zvaničnici će u svom djelovanju uvijek imati na umu da su izabrani predstavnici svih građana u Općini/Opštini Bosanski Petrovac a ne nekog njihovog dijela.

U svom djelovanju uvijek će svoje odluke i akcije podešavati isključivo u okviru propisa i po procedurama koje su predviđene propisima.

Ni jednu svoju odluku neće donijeti, niti će glasati, niti prećutati, da javno iznesu svoj stav ukoliko im je poznato da određeni akt koji treba da se donese nije u skladu sa propisima ili da nije poštovana procedura njihovog donošenja.

INTEGRITET

Član 5.

U svom djelovanju izabrani zvaničnici će, prema svojim znanjima i sposobnostima, uvijek samostalno donositi svoje odluke za koje su odgovorni, uvijek imajući u vidu najbolji interes svih građana i neće preuzimati finansijske ili druge obaveze prema pojedincima i organizacijama koje bi za uzvrat tražile da vrše uticaj na njih u obavljanju njihovih javnih funkcija.

NESEBIČNOST

Član 6.

Poštujući pravila da mandat pripada izabranom zvaničniku, a ne političkj stranci sa čije je liste izabran, izabrani zvaničnici će postupati u skladu sa općim/opštim intresom koji isključuje rad za finansijsku dobit ili bilo koju drugu direktnu ili indirektnu korist za sebe ili lica iz svog privatnog okruženja.

ZABRANA MITA I KORUPCIJE

Član 7.

Izabrani zvaničnici ni u kom slučaju neće u obavljanju svojih funkcija primati ili davati neku naknadu, obećavati nagradu, ili kakvu drugu korist, ili na bilo koji drugi način se ponašati što se može okarakterisati kao aktivno ili pasivno podmićivanje po važećem zakonodavstvu, a u vezi sa podržavanjem ili ne podržavanjem određenog prijedloga akta, a naročito ako su ti stavovi suprotni Ustavu, zakonima, Statutu Općine/Opštine i drugim propisima.

OTVORENOST I ODNOSI SA MEDIJIMA

Član 8.

Izabrani zvaničnici će u svom djelovanju i u vezi sa odlukama koje donose uvijek biti otvoreni, blagovremeno obavještavati javnost putem sredstava javnog informisanja i ni jednom svojom aktivnošću neće izbjegavati da jasno i javno saopšte svoje stavove i razloge za sopstvene odluke i ponašanja.

Prema zahtjevima medija će pošteno i u potpunosti pružati informacije vezane za obavljanje njihovih dužnosti i neće pružiti ni jednu povjerljivu informaciju ili informaciju koja se tiče privatnog života izabranih zvaničnika odnosno predstavnika ili trećih lica.

Izabrani zvaničnici neće pružati javnim medijima niti inače obavještavati javnost informacijama koje su po Zakonu, Statutu Općine/Opštine Bosanski Petrovac ili na samoj sjednici Vijeća proglašeni kao tajna.

POŠTENJE I ODGOVORNOST

Član 9.

Izabrani zvaničnici će svoje dužnosti izvršavati pošteno u najširem smislu riječi i za svoje odluke i aktivnosti su odgovorni sudu javnosti i biće uvijek spremni da se podvrgnu bilo kojoj vrsti kontrole koja odgovara njihovom položaju.

Osjećajući sopstvenu odgovornost izabrani zvaničnik neće svoju poziciju koristiti za davanje prijedloga akta ili insistirati na donošenju akta za koji zna, ili je to očigledno, da je suprotan propisima.

IZBJEGAVANJE SUKOBA INTERESA

Član 10.

Izabrani zvaničnici će se u svakom slučaju pridržavati odredaba Zakona o sukobu interesa i drugih zakona koji uređuju nespojivost funkcija izabranog predstavnika sa funkcijom ili položajem u lokalnoj upravi, državnom organu ili preduzećima.

UPRAVLJANJE RESURSIMA

Član 11.

Izabrani zvaničnici će sa najvećom pažnjom i osjećanjem sopstvene odgovornosti usmjeravati svoje ponašanje i odluke koje se odnose na finansijska sredstva i upravljanje imovinom Općine/Opštine, te će se u tom slučaju uzeti mišljenje javnosti, isključivo u skladu sa propisima i općim/opštim interesima. Mišljenje javnosti će se naročito uzeti u obzir prilikom razmatranja i usvajanja Budžeta, kapitalnih investicija, te odluka o kreditnom zaduženju Općine/Opštine.

Svojim ponašanjem neće dati povoda za niti aktivno ili pasivno učestvovati u pripremanju ili podsticati donošenje nepravilnih odluka koje bi mogle donijeti lične koristi ili ostvarenje nečijeg privatnog interesa sa kojima su povezani finansijskim ili nekim drugim interesom.

Izabrani zvaničnici će se uzdržavati od svih akcija koje bi trebalo da rezultiraju izborom, imenovanjem ili postavljenjem lica na određene pozicije a da se pri tome ne sprovode propisi, ne obezbjedi postupak otvorene javne konkurencije, nezavisne provjere i poštovanja principa kvaliteta, profesionalnosti, znanja i sposobnosti.

OBAVEZA PROFESIONALNOG USAVRŠAVANJA

Član 12.

U cilju što uspješnijeg obavljanja sopstvenih dužnosti, izabrani zvaničnici će kako samostalnim aktivnostima tako i prisustvujući seminarima, savjetovanjima i drugim oblicima edukacija, obogaćivati i usavršavati svoja znanja i sposobnosti.

IZBJEGAVANJE AKUMULACIJE POZICIJA

Član 13.

Izabrani zvaničnici će u potpunosti biti posvećeni ispunjavanju dužnosti koje im pripadaju kao neposredno izabranom zvaničniku a imenovanja na druge pozicije će prihvatati samo u onoj mjeri koja neće umanjivati njihove radne i druge sposobnosti za izvršavanje osnovnih obaveza.

UZAJAMNO POŠTOVANJE I UVAŽAVANJE, TE UVAŽAVANJE I POŠTOVANJE POLITIČKE KULTURE

Član 14.

U međusobnoj komunikaciji i uopšte komunikaciji sa javnošću izabrani zvaničnik će u svakom slučaju istupati sa uvažavanjem i poštovanjem njegovati kulturu dijaloga, kao i političku kulturu, razgovijetno saopštavati svoje misli i ideje, izbjegavajući korišćenje izraza koju mogu vrijeđati ili omaložavati druge ličnosti ili grupe, na taj način poštujući jednaka prava svih na uvažavanje njihove ličnosti i uvjerenja.

Poštujući obaveze izabranih zvaničnika da su dužni prisustvovati sjednicama Općinskog/Opštinskog vijeća kao i radnih tijela Vijeća čiji su članovi, a uvažavajući jedni druge, neće napuštati zasjedanje prije završetka a ni tokom trajanja a da prije toga ne

saopšte javno ili predsjedavajućeg razlog povremenog ili potpunog napuštanja zasijedanja.

Ako su opravdanim razlogom spriječeni da prisustvuju sastancima ili sjednicama na koje su uredno i blagovremeno pozvani, zvaničnici će predsjedavajućem saopštiti te razloge a predsjedavajući će Općinsko/Opštinsko vijeće, radno tijelo ili forum obavijestiti o razlogu izostanka pozvanog zvaničnika.

Takođe, izabrani vijećnici će nastojati da prisustvuju javnim manifestacijama ili javnim skupovima na koje su uredno i blagovremeno pozvani u svojstvu izabranog zvaničnika.

3. SVEČANA IZJAVA

Član 15.

Izabrani zvaničnici prilikom preuzimanja dužnosti i usvajanja etičkog kodeksa daju i potpisuju svečanu izjavu o prihvatanju i obavezi poštivanja etičkog kodeksa kako je to predviđeno Poslovníkom o radu Općinskog/Opštinskog vijeća Bosanski Petrovac.

Sastavni dio ovog Etičkog kodeksa je i forma izjave koju su zvaničnici dužni potpisati. Svečana izjava je u pisanoj formi.

Tekst svečane izjave glasi:

Ja, (ime i prezime zvaničnika) svečano izjavljujem da prihvatom sve principe i ostala pravila sadržana u Etičkom kodeksu i obavezujem se na poštivanje toga Etičkog Kodeksa u znak čega se lično potpisujem.

PRAĆENJE PRIMJENE ETIČKOG KODEKSA I RAZVOJA POLITIČKE KULTURE

Član 16.

Izabrani zvaničnici će se uzajamo podsjećati i pozivati na obaveznost poštovanja principa ponašanja utvrđenih ovim Etičkim kodeksom.

Predsjedavajući Vijeća će sa najvećom pažnjom pratiti ostvarivanje principa utvrđenih ovim Etičkim kodeksom te preduzmati druge mjere u skladu sa Poslovníkom o radu Općinskog/Opštinskog vijeća Bosanski Petrovac.

Član 17.

Izabrani zvaničnici biće spremni da u slučaju ustanovljenja povrede neke od odredbi ovog Etičkog kodeksa budu podvrgnuti sankcionisanju a po postupku koji je utvrđen ovim Etičkim kodeksom.

Svrha ovog sankcionisanja je javna osuda neprihvatljivog ponašanja suprotnog ovom Etičkom Kodeksu kao i moralni uticaj na buduće ponašanje izabranog zvaničnika.

Sankcije za povredu neke od odredbi ovog Etičkog kodeksa su:

- ukor,
- javni ukor,
- novčana kazna.

Uz sankciju ukora i sankciju javnog ukora izriče se, kao sporedna sankcija i novčana kazna, u skladu sa ovim Etičkim kodeksom.

Ako se izrekne sankcija javni ukor ili novčana kazna kao glavna sankcija, javno će se objaviti izvještaj o ispitivanju osnovanosti kao i odluka Općinskog/Opštinskog vijeća.

Član 18.

Ako se izrekne ukor kao sporedna sankcija izriče se i novčana kazna u visini od 10 % od vijećničke naknade za period od dvije održane sjednice.

Ako se izrekne javni ukor, kao sporedna sankcija izriče se i novčana kazna u visini od 20 % od vijećničke naknade za period od 4 održane sjednice.

Novčana kazna, kao glavna sankcija, izriče se u visini od 40 % od vijećničke naknade za period za 3 - 6 održanih sjednica. Ako je izrečena novčana sankcija kao glavna sankcija smatra se da je izrečena kao sporedna i sankcija javnog ukora.

Član 19.

Za ponovljeno i učestalo kršenje ovoga Kodeksa se uz glavnu kaznu izriče i povišena novčana kazna u iznosu koji je za dodatnih 10% od vrijednosti paušala veći od novčane kazne izrečene predhodnog puta.

Član 20.

U cilju obezbjeđenja primjene ovog Etičkog Kodeksa, Općinsko/Opštinsko vijeće obrazuje poseban Etički odbor kao radno tijelo Općinskog/Opštinskog vijeća.

Etički odbor prati primjenu Etičkog kodeksa a naročito javno iznesene primjedbe i preporuke (u bilo kom obliku), postupa po pojedinačnim prijedlozima za utvrđivanje postojanja povrede Etičkog Kodeksa, podnosi izvještaje Općinskom/Opštinskom vijeću sa preporukama i vrši druga ovlašćenja utvrđena ovim Etičkim kodeksom.

Etički odbor se sastoji od 5 članova od kojih su 3 iz reda vijećnika a 2 iz reda uglednih i afirmisanih građana u javnom životu odnosno predstavnika civilnog društva.

Etički odbor bira predsjednika i zamjenika predsjednika iz reda svojih članova a koji su vijećnici.

Na rad Etičkog odbora primjenjuju se odredbe Poslovnika o radu Etičkog odbora.

Član 21.

Pored nadležnosti Etičkog odbora iz prethodnog člana, Etički odbor redovno prati poštovanje političke kulture i motiviše izabrane zvaničnike da poštuju taj princip ponašanja.

Član 22.

Svaki vijećnik, građanin kao i organizacija, ovlašćen je da podnese prijavu povrede Etičkog Kodeksa, a u prijavi će obavezno navesti za koje radnje smatra da su povreda Etičkog Kodeksa i kojim dokazima to potvrđuje.

Prijava se podnosi Etičkom odboru putem Službe zadužene za poslove Općinskog/Opštinskog vijeća.

Anonimne prijave neće se uzeti u razmatranje.

Etički odbor razmatra prijavu i ovlašćen je da provede postupak ispitivanja osnovanosti prijave, da provede potpuni dokazni postupak i nakon toga odluči da li postoji povreda neke od odredbi ovog Etičkog kodeksa.

Ako Etički odbor zaključi da nije bilo povrede neke od odredbi ovog Etičkog kodeksa o tome će obavijestiti podnosice prijave a Općinsko/Opštinsko vijeće u takvim slučajevima obavještavati najmanje šestomjesečno.

Ako Etički odbor zaključi da je određeni izabrani zvaničnik učinio povredu neke od odredbi ovog Etičkog kodeksa Općinskom/Opštinskom vijeću će podnijeti detaljan izvještaj sa preporukom o izricanju određene sankcije.

Općinsko/Opštinsko vijeće odlučuje o vrsti i visini sankcije na osnovu preporuke Etičkog odbora, izuzev ako samo priloži dodatne dokaze o nepostojanju povrede Etičkog Kodeksa ili povrede postupka utvrđenog ovim Etičkim kodeksom.

Postupak rada pred Etičkim odborom detaljno će se regulisati Poslovníkom o radu Etičkog odbora.

Član 23.

Sankcija ukora se izvršava saopštavanjem predsjedavajućeg Općinskom/Opštinskom vijeću o izrečenoj sankciji i dostavom primjerka odluke izabranom zvaničniku prema kojem je izrečena sankcija.

Sankcija javnog ukora se izvršava objavljivanjem izvještaja i odluke Općinskog/Opštinskog vijeća o izricanju sankcije u "Službenom glasniku Općine/Opštine Bosanski Petrovac" i oglasnoj ploči.

Novčana kazna se izvršava dostavom odluke Općinskog/Opštinskog vijeća Službi za obračun vijećničkih naknada koja će obezbijediti njeno izvršenje umanjnjem vijećničke naknade u skladu s tom Odlukom.

O izrečenim sankcijama za povredu ovog Etičkog kodeksa vodi se evidencija u Službi zaduženoj za poslove Općinskog/Opštinskog vijeća.

Sve informacije o završenim slučajevima su dostupne javnosti.

OBJAVLJIVANJE

Član 24.

Svojim aktivnostima izabrani zvaničnici a prvenstveno članovi Etičkog odbora će obezbijediti internu i eksternu promociju ovog Etičkog kodeksa javnosti i medijima.

Ovaj Etički kodeks se će objaviti u "Službenom glasniku Općine/Opštine Bosanski Petrovac".

Ovaj Etički kodeks stupa na snagu osmog dana od dana objavljivanja u "Službenom glasniku Općine/Opštine Bosanski Petrovac".

Broj:02/1-49-960-8/06
Datum:25.09.2006.god.

Predsjedavajući Vijeća
Ahmet Hidić, s.r.